

IBIRO

Warage o Ayeedonek Ol o Ibiro

Azoozek Jooi ol naaten neerin

1 ¹ Baale rak laadun azoozek Jooi jijitigaac lak ci meel golowe ci meelik naaten nyakananet. ² Maje zin bar iinya nicoko iiya kozoozo ki ageet naaten neerin. Eenyca Jooi laadun looc naatin, ma aŋera niini nɔɔnɔ ka kanyek kaal dook nɔɔnɔ tiŋeere vurta. ³ Ma naatin kacin vooritin o diŋdiŋon o Joowo. Ma atobo didi niini ki Jook golowe dook tebezek. Ma anyek niini looc nico kibil kodok dɔyize o zɔɔz onin. Ma vurte baal aarai niini ol baciinok ugeec e, ook tammu tadena, ma ako aavi loota aziite Joowo azo titiny anyak dɔyiz dook. ⁴ Anyozozek nɔɔnɔ diŋdiŋoni kujuk toonnyak o Joowo kiyo buk akanek Jooi nɔɔnɔ zaar ci adiŋdiŋ kujuk zaar o toonnyawu o.

Adiŋdiŋ Yesu kujuk toonnyak o Joowo

⁵ Naan laadun kenek Jooi toonnyak ogin codoi naatineej ne, “Kanyin ineet diŋdiŋon onan giye o eene niina neeran, ma keen naana baatun.” ⁶ Buk baale ako zee mazi itoona Jooi neerin ween abuu looc kiiya kuduwak ol zɔɔz onin e, azi bodo ne, “Abon adiŋdiŋan toonnyawa ogane dook nɔɔnɔ.”

⁷ Aduwa zin baale Jooi zooze ci akati toonnyak gi ci azi ne, “Keenyca naana toonnyak ogan ka kidiŋdiŋantan aneet. Atobo ogen ki hɔɔt, maje ogen atobo ki lanyci o gooyo.”

⁸ Maje zooze ci akati neerin azi ne, “Ineet Jook abil baliin unune noko zee been neen. Ma abal niina ol ugun alaazete unun juruŋ. ⁹ Areez niina bonat, ma abur gerzitin. Gi zin ci kaŋeranan naana Jooi unune ineet, ma kanyin talniin ki diŋdiŋon ci appe ɔɔɔt ineet doon, kɔkɔm bodo eet oma o neen.”

¹⁰ Ma azi bodo warage o beniiowu naaman ne, “Een niina Manyi Jook baal laadun eenyca looc ki tammu taden kinatamma aziite unun e neen. ¹¹ Bar zin niigi dook katin adicai. Maje niina abil noko zee been neen. Katin niigi dook adicai kiyo rumanane o. ¹² Atuuaz katin niina nɔɔgo kiyo bataniya o. Ma abali katin nɔɔgo kiyo rumanane o. Maje bar niina abil iinya dook noko, ma alaŋ anyatiz been neen.”

¹³ Ma naan buk laadun Jooi kuduwak toonnyaye ogin codoi zɔɔz ci anek ne, “Aavu loota ŋina libire can azo o zee ma kanyi ol o amarninin ineet rocek looc zɔɔne.”

¹⁴ Mazin yo laadun toonnyawa kalakaz? Niigi vonjizok o adiŋdiŋan Jook, ma goon itoon niini nɔɔgo ka kɔɔt kitiritit ol o agama zɔɔz o Joowo rogeto.

Má abuluzu rogzen o Joowo adikir naaten Yesu

2 ¹ Mazin giye nico abon naaga kazooni demziinok ween didi akati Yesu baal kiziiyit e juruŋ ka calaŋ bodo areyeket. ² Ma lotinowa baal anyaa toonnyawa o Joowo e waanice ayelizyai keleemnyai. Ma ol baal goon alaŋ ano lotinok niceke, ma alaŋ azooni e, apawonek waanice goon gerzitin o agano ki nɔɔgo. ³ Mayo zin inoko mā alaŋ kazooni naaga rogzen ci adikir baal aduyaket ageet naaten Manyi Yesu noko, ka zin yo koca tiŋeere keelta eleeti ku? Ma ol baal iziiyit zɔɔz onin ɔɔwa naatin ele e, ayelzeket niigi ageet didi rogzen nici abil tɔ. ⁴ Ma buk goon Jooi ayeleket ageet kaviyawa nicaga aleemnyai naaten yelzan o dɔyiz onin ki kaal o ateeɔ ol biye. Ma anyewun bodo buk niini dɔyizok o Vonjiz onin ol o eŋera niini.

Anyek Jooi Yesu kabal kaal dook

⁵ Ma looc ci kazɔɔz naaga colai ka kiiya neke, alaŋ katin anyek Jooi toonnyak ogin ka kabalit. ⁶ Bar azi waragewi o Joowo naaman giye ci akati alaazet looce o colai ne, “Mayo laadun eet ci deer gitaz akoma abaaban niina nɔɔnɔ o? Naa arican eet ci deer labak o? ⁷ Anyi niina nɔɔnɔ rak kizi celbez ŋintimiliny toonnyaye ugun, ma anyi bodo nɔɔnɔ katin diŋdiŋon been titinyon. ⁸ Ma anyi niina nɔɔnɔ kabal kaalyan dook.” Azi zɔɔz nici ne, Anyek Jooi katin eet ci deer kabal kaal o eenyca niini dook loota. Ma naan kicinit naaga inoko eet ci deer abal kaalyan nicoko dook. ⁹ Bar zin kicinit Yesu baal anyek Jooi nɔɔnɔ kizi celbez rak ŋintimiliny toonnyaye ogin waan baal akuni looc e. Anyozozek nɔɔnɔ diŋdiŋoni ki titinyon giye baal aku apirmane niini, ma amezi piryakzet dɔyize o Joowo zee makacin adaak ole dook e.

¹⁰ Nɔɔnɔ zin neen o anyaa ol rogzen. Ma agano Joowe o eenyca kaal dook, ma azooni nɔɔgo naati anyeke niini Yesu kizimnyai gidente onin ka kanyaa ol ci meel kivita kozolit been nɔɔnɔ diŋdiŋon onin. ¹¹ Nɔɔnɔ neen o anyek ol kobonta ŋume o Joowo, ma iziti niini been nɔɔgo dɔl ci adoye baatineej. Ma gole nico alaŋ anyak Yesu alyaan naati awe niini nɔɔgo kiziti gɔtɔnɔgi cigin.

¹² Kiyo anek niini Jook beniinowe o reen ne, “Naan kako kanaatin ineet ŋume o ol ugun een gɔtɔnɔga dook.” ¹³ Azi niini bodo buk ne, “Katu naana tup noko Jook.” Ma azi bodo buk ne, “Karomena ŋinaanto kibeen gɔtɔnɔga o tuwento baal anyan Jooi e.”

¹⁴ Gɔtɔnɔgi zin nicoko neen ol o deer. Buk zin Yesu itiryai kizi eet ci deer kiyo niigi o ka kiiya kadaak niini, ma uulal dɔyiz o Loryento, eeci anyak Loryenti dɔyiz ci daayizo. ¹⁵ Ma ɔɔga niini daayize onin ol baal agam Loryenti nɔɔgo irkitok ugeec rogeto dook giye o aŋolin niigi daayiz e. ¹⁶ Alaŋ zin aku niini o ka kiiya kitiritit toonnyak o Joowo, bar ka kiiya kitiritit ol o anyak tuwen kiyo baale Ibrayim e.

¹⁷ Zin giye nico agano Joowa naati atobone Yesu ki gɔtɔnɔgi golowe dook, ka kuwucek niigi nɔɔnɔ, ma alal nɔɔnɔ ziniz Joowa kiyo alaani o ceez o Joowo adikir baal goon anyek Jook taabinet ka kotoŋ Jooi baciinok ugeec e. ¹⁸ Inoko zin atiritit niini ol o goon acina Loryenti, eeci niinilya baale icinnyai buk, ma apirna ɔɔɔt kiyo niigi o.

Titiny Yesu kujuk Mosis

3 ¹ Gɔtɔnɔga o tuwento o awanuŋ Jooi ka ozolit baliin o tammu tadenu, abaabanit ɔɔɔt Yesu o itoona Jooi ka kizi alaan ci adikir naaten tuwen onai. ² Iimi baale nɔɔnɔ ziniz naaten Jook o aŋera nɔɔnɔ ka kutugu liŋliŋon nico kiyo baale Mosis iimi ziniz liŋliŋonte onin naati arayin ol o Israyil baal aŋera Jooi nɔɔgo kiziti ol cigin e. ³ Goon zin laadun eeti ci eenyet ceez titiny ɔɔɔt kujuk

ceez ci ona eenyca niini o. Mazin buk gole nico, Yesu anyak diŋdiŋon ɔɔt kujuk Mosis. ⁴ Mazin gɔon laadun ceez eenyca ɔl ci deer. Bar zin Jook neen o eenyca kaal dook. ⁵ Ma baale Mosis niini gabaren ci labak, bar zin waanice iimi nɔɔnɔ ziniz ɔɔt liŋliŋonte o alinliŋoneke niini Jook ole o Israyil. Ma aduwak niini nɔɔgo kaal o aduwa Jooi o ka kiitazo katin. ⁶ Zin bar Kiristo niini ŋeerti Joowo o iimi ziniz neen. Abal niini bor o Joowo kizi logo o korgu ele. Zin naaga mā katu Yesu, ma kare iiten o katin abadaan niini, kiziti koca naaga bor cin didi.

Anyek Yesu ɔl o Joowo yubzen

⁷ Aduwa Jooi Vɔŋize onin gi ci azi ne, “Mā aziiknu molok onan waanico, abon didi aziiknu juruŋ. ⁸ Má anyeku zinzeeti kodoyit kiyo baale agɔon ɔl o Israyil irkitowe baal acinanan niigi aneet waan baal aluugi balala e. ⁹ Mayo nuun icinit jijitugooc dɔyiz onan irkitowe baal een eet ram e, icintawan waanice niigi aneet balala ŋinaante. ¹⁰ Mazin baale giye nico kotoboreya naana ɔl niceke nɔŋ, ma kize ne, ɔl nicoko tup nɔko arɔŋ nɔgo zinzeeti cigeec kaal oogi doon, ma alaŋ arooŋnyan niigi aneet, ma ajura ŋaati aziiŋni zɔzɔ onan karicane nɔgo. ¹¹ Kotobora ni waanice nɔŋ, ma kitoon zaar ogan maany kazi ne, Alaŋ bai kanyi nɔgo kivitayan aneet ka kivita kuyubuzit ŋaatan been neen.” ¹² Gɔtɔnɔga o tuwento, abon azoonu eleeti ka kɔkɔma eet codoi ŋaatonooŋ ci anyak ziniz ci ger ɔɔt ci akɔmni tuwen ka kimiirɔi nɔɔnɔ ki vurut ŋaaten Jook o abil nɔko been neen. ¹³ Bar abon ilotonu niiga maany iinya dook gerze ŋaan alabanuŋ Loryenti zee ma anyuŋ kodoyit zinzeeti. Iinya dook utuguz nɔko, eeci ŋaan anyaku waŋi ci aziiŋnu zɔzɔ o Joowo. ¹⁴ Mā kamena naaga keel zɔne kodoyit kak nɔko ebaal kagaman Yesu ɔwa e, kodoye koca naaga kibeen Yesu. ¹⁵ Zin giye nico abon aziiknu Jook giye o ane waragewi ne, “Mā aziiknu molok o Joowo waanico, má anyeku zinzeeti kodoyit kiyo baale agɔon ɔl o Israyil waan baal acinanan nɔɔnɔ balala e.”

¹⁶ ɔl jaŋ ci da zii molok ci Joowo azoozek nɔgo, ma acina nɔɔnɔ ŋaati apezi niigi zɔzɔ onin o? ɔl baal aduŋnan Mosis nɔgo looce o Masiru e neen. ¹⁷ ɔl jaŋ baal anyek Jook kotobor nɔŋ irkitok eet ram e? ɔl baal abor gɔl o Joowo, ma adaai kotoŋtozek eleeti ugeec balal e neen. ¹⁸ ɔl jaŋ baal aduwak Jooi terkediin o azi ne, “Alaŋ bai niigi avunakan aneet ka kivita kuyubuzit ŋaatan been neen,” e? Aduwak baale niini zɔzɔ nico ɔl baal alaŋ azooni zɔzɔ onin balala e. ¹⁹ Inoko zin kicinit naaga alaŋ anyek Jooi waanice ɔl niceke kɔɔt ŋaabaal arooŋek niini nɔgo e, eeci waanice alaŋ niigi atuwe.

4 ¹ Inoko zin eterkedeyet Jooi ageet gi ci azi ne, Kavɔ naaga ŋaatin ka kɔɔt kuyubuzit kibeen nɔɔnɔ. Abon zin naaga dook kabek eleeti ka kɔkɔma ŋaatonooŋ eet codoi ci amiiri ki vurut zee ma ajaar yubzen nici. ² Eeci kiziiyit naaga terkediin o Joowo kiyo baale azii ɔl ci baal abaak balala neke. Iziiyit baale niigi kaviyak nicoko, ma bar waanice alaŋ atirit nɔgo, eeci iitene ci baal aziiŋni niigi neke ŋaan kagamta tuwenta. ³ Kavɔ zin yubzente o Joowo naaga doon o katuwe ka kɔɔt kuyubuzit ŋaatin. Maje ole o alaŋ atuwe azi Jooi ne, “Kotobureya baale naana nɔgo nɔŋ, ma kitoona zaar ogan maany kize ne, Alaŋ bai kanyi nɔgo kivitayan aneet ka kivita kuyubuzit ŋaatan been neen.” Aduwa niini gi nico, mayo nuun idimdiman niini ŋino waan ka kuyubuziti niigi waan baal eenyane niini looc e. ⁴ Azɔzɔ waragewi o Joowo ŋaaman zɔzɔ ci akati iiten ween torgerem azi ne, “Ayubuz Jooi iwe ween torgerem waan baal idicai niini liŋliŋon onin dook e.” ⁵ Inoko kabedeke zɔzɔ nico, “Azi Jooi ne, Alaŋ bai avunakan niigi aneet ka kivita kuyubuzit ŋaatan been neen.” ⁶ Mazin ɔl baal iziiyit terkediin o Joowo ɔwa e, ŋaan kɔɔt ŋaatin ka kɔɔt kuyubuzit, eeci waanice alaŋ atu niigi nɔɔnɔ. Bar zin ŋaan anyak ɔl oogi tɔ ci ka kivita kɔɔt, ma avɔ ayubuz niigi Joowa. ⁷ Gi nici abil tɔ didi, eeci arek Jooi iiten ci ka kivitake ɔl nɔɔnɔ. Ma azi niini ne, “Iiten zin o ka ooti niiga yubzenta neen nici.” Azɔzɔ Jooi gi nico baale ŋaaten Devid waragewe onin azi ne, “Mā aziiknu molok o Joowo waanico, má anyeku zinzeeti kodoyit.”

⁸ ŋaan zin baale ɔl o Israyil kurumit yubzen o Joowo waan baal arayin Jasuwa nɔgo avɔyi looce o kazi Kanan e. Gi zin ci azɔzɔ Jooi yubzen oma o neen. ⁹ Mazi abil nɔko, ŋaan zin yubzen ci ɔl o Joowo are nɔgo ka buk kuyubuzit niigi yubzen ci abil kiyo o Joowo baal eenyane looc, ma ayubzi iinyaye ween torgerem e. ¹⁰ Eeci mā akunak eeti Jook, ma ayubuz ki nɔɔnɔ, ayubuz buk niini liŋliŋonowe ogin kiyo baale Jooi ayubuz iinyaye baal adican liŋliŋon onin eenyane looc e. ¹¹ Abon zin naaga katoma juruŋ ka kɔɔt kuyubuzit Joowa. Alaŋ karɔŋ naaga eet codoi ŋaatina kimiire ki vurut calaŋ ako yubzente nico giye calaŋ azooni zɔzɔ o Joowo kiyo baale ɔl o Israyil baal alaŋ azooni zɔzɔ onin, ma adaai balala e.

¹² Ma zɔzɔ o Joowo zɔzɔ ci arogi, ma anyak dɔyiz ci appe ɔɔt kiyo dila ween niim gɔon leedi ɔɔt o. Anim zɔzɔ onine kakat ziniz ci eet ci deer eecitɔ rɔp, ma ako kook kaavu baabaninte onin been vɔŋize onin, ma ako kook kurum ame, ma apak kaalyan o abaaban eeti kibeen kaal o arɔŋ ziniz onine dook. ¹³ Akɔm zin gi ci ka kɔɔde ŋaaten Jook been neen. Bar kaal ci eel loota noko dook adenyai keberene ogin lai. Zin naaga dook katin kavɔ keel ŋume onin, ma kabɔrak nɔɔnɔ kaal o kagɔon naaga loota dook.

Yesu niini alaan o ceez o Joowo adikir

¹⁴ Abon zin naaga kagam tuwen ona kɔdɔk, eeci kanyak alaan ci ceez o Joowo adikir ci adiŋdiŋ ɔɔt. Ook baale niini zee been Jook ele. Niini zin Yesu ween ŋeerti Joowo neen. ¹⁵ Ma alaani cinai adikir noko aga kaal o alaŋ naaga kanim kutuguz, eeci baale buk niini iya izi eet ci deer, ma acinnyai kiyo naaga o, maŋaan niini kabaca baciin codoi been neen. ¹⁶ Kanyayit zin gɔon naaga moozet ka koŋoŋzɔt Jook baliinte onin ŋaao ka kɔɔt kojoktai naaga irken onin, ma kawucnek naaga nɔɔnɔ. ŋinaante ŋaan kajowa naaga tirten iiten ci gɔon te akunaket ageet piryakzet.

5 ¹ Ma alaata o ceez o Joowo adikir gɔon alinliŋonek Jook dook, aŋeryai gɔon niigi ole ugeec ele ka karaktɔi gɔnɔgi kaale o anyek niigi Jook. Ma agoonek Jook todoyok o ka kaarai niini baciinok ugeec. ² Ma eeti ci aŋeryai niini eet ci atibez ole o ŋaan kagaac gɔl o Joowo kibeen ole o agɔon baciinok, eeci niini alya iina gɔon tup lak ci meel buk. ³ Mazi giye o gɔon iinane niini, alaŋ agoonek niini Jook todoyok baciinowe ci ɔl oogi doon, bar agoonek baciinowe ogin buk. ⁴ Akɔm zin eet ci aŋerak ele titinyɔn ci ka kizɔi alaan ci adikir agoonek Jook todoyok, dooke coma aŋera Jooi nɔɔnɔ kiyo baale aŋera eet o kazi Aron e.

⁵ Mazin buk gole ci atobo ki nico, Kiristo alaŋ aŋerak ele maany titinyɔn ci eene alaan ci adikir agoonek Jook todoyok, bar Jook neen o anek nɔɔnɔ ne, “Kanyin ineet diŋdiŋon onan giye o eene niina ŋeeran ma keen naana baatun.” ⁶ Azi Jooi bodo waragewe onin ŋaaman ne, “Een niina alaan ci azɔzɔ ɔl ŋume onan nɔko zee been neen gole ci atobo ki o alaan baal kazi Melikizadek e.”

⁷ Iinyaye baal ŋaan abaayi Yesu loota e, ilalek waanice niini Jook o anyak dɔyiz molowe ci appe ki luwanta ka kitirit Jooi nɔɔnɔ kemez daayiz. Iziiwun ni Jooi nɔɔnɔ waanice, eeci acelbezzen niini ele, ma arez Jook, ma agɔon kaal o arɔŋ Jooi doon. ⁸ Mayo nuun een niini ŋeerti Joowo ele o, edemez niini gɔl ci azooni zɔzɔ o Joowo gidente onin baal apirane e. ⁹ Mazin giye o waanice izimnyai niini demziinte nico, izi niini gɔl ci eelyane ɔl dook o azooni zozok ogin. ¹⁰ Zin giye nico anyewun Jooi nɔɔnɔ kizi alaan ci adikir ci agoonek nɔɔnɔ todoyok gole ci abil kiyo o alaan baal kazi Melikizadek e.

Iricanit Jook calaŋ abudenu

¹¹ Anyak zin inoko zoozok ci meel akati gɔl nico ka waan kozoozit, bar zin zɔɔz nico adɔi kak ŋaati agayu keŋ cin, eeci alaŋ niiga gɔɔn aziijnenu taman. ¹² Ma niiga aganonu waan ŋaati ademezu ɔl oogi, eeci utuyu Yesu baal reena, bar zin inoko niiga alya ŋaan rak arooŋnyu eet ci ka kedemezuŋ demziin o Joowo aboke. ŋaan eelnu niiga tuwente unooŋ ŋaati Yesu kiyo dɔlya o miliny gɔɔn aam iira doon o, ma iirana atobo ki demziin o Joowo aboke. Alaŋ rak niiga animnyu edemezit demziin o Joowo adɔi kak o atobo ki dayiin o adɔi. ¹³ Zin eeti ci ŋaan aam iira doon atobo niini ki dole o miliny gɔɔn alaŋ aga gi ci ger ki gi ci abon o. ¹⁴ Ma dayiin o adɔi agano ki ɔl o adikir. Atobo niigi ki ɔl o edemezit demziin o Joowo juruŋ, ma agaac gi ci abon ki gi ci ger ŋume o Joowo. Ma demziin nico alaŋ een lutet.

6 ¹ Abon zin naaga kavɔ ki taden demziinte o Kiristo calaŋ bodo kamiironek demziin baal oowu baal kotoŋtek looc vurma e. Alaŋ naaga karɔŋ kameda kebedozek kaal baal oowu baal ŋaan kakanan uuŋni baal kooŋni kaal o ger loocu, ma kavu kagaman Jook, ma karike eleeti ogaac nɔɔnɔ e, ² kiyo demziin o toonyenet o ka kaaryai oŋe, ki demziin o kataadeke azeen ɔl ka kiiyak nɔɔgo Vɔŋjizi o Joowo, ki demziin o akati ŋaazi daayiza, been demziin o akati payiin o apayeki Jooi gerzitin ɔl o abor nɔɔnɔ iitene ci aŋoneke lɔɔci e. ³ Mā akoleket Jooi ageet gɔl, abon kayaŋ di bodo naaga demziinok baal oowu e, ma kavɔ eogen.

⁴ Eeci mā anyak ɔl ci agaac zɔɔz o Joowo een didi, ma oŋ niigi zɔɔz nico bodo, ma amiiri ki vurut, akom bodo gɔl ci ka kabadai niigi ka kimiirtozekɛ zɔɔz ween didi been neen, eeci baale rak aavtiyo niigi vooritine o Joowo, ma atarit niigi mayuwenet o Joowo abon, ma abaak Vɔŋjizi o Joowo ŋaatineeŋ. ⁵ Ma aga niigi bonat o Joowo nɔkɔ, eeci alinliŋ zinzeetine ugeec. Ma aga dɔyiz o baliin o Joowo o ka keyelizyai katin. ⁶ Agaac niigi kaal nicoko dook nɔkɔ, ma amiiri bodo ki vurut. Abiceec zin ŋaatineeŋ ŋaati ka kabadai bodo kivita kabadi mony oŋene ugeec, eeci eel niigi kiyo ŋaan abor Yesu, ma amiironeke niigi nɔɔnɔ dodinet keete ween talakec o, ma anyaak niigi nɔɔnɔ alyaan kɔla.

⁷ Abaanit di zɔɔz ci tɔdɔwawu. Gɔɔn ma atiilnak tammu tɔdɔ maam lak ci meel, ma aduŋnan kaal ci abon ci agano ki linliŋɔn ci ɔl o eevyi, abon zin kaga naaga Jook neen o amayuk tɔdɔ nicoko. ⁸ Bar zin mā alaŋ alinliŋ ɔl juruŋ, aduŋna tɔdɔwaye nicoko bila ki ciiren. Ma abor Jooi tɔdɔ nicoko ɔrɔɔt, ma atooz katin gooya lai.

⁹ Laŋotigan o tuwento kareezuŋ, mayo nuun kaduwakuŋ naaga igeet zɔɔz ci adɔi kak noko, kajezuŋ naaga igeet. Kagaya agoonu gi ci abon agano ki rogzen unooŋ giye o anuyu niiga gɔl o Joowo. ¹⁰ Ma Jooi tup apak kaal gole ci abil tɔp. Ma alaŋ areyek nɔɔnɔ linliŋonowa ki reezinet o areezu niiga nɔɔnɔ baal ayezlanu niiga giye o atiritu gonogu o tuwento baale zee been inoko buk o. ¹¹ Karooŋnyuŋ naaga igeet dook emeda gole o Joowo kodot. Ka zin ojokta katin kaal o arɔŋ Jooi kanyuŋ dook. ¹² Alaŋ karooŋnyuŋ naaga igeet kadaaktuŋ eleeti. Bar karooŋnyuŋ eelit kiyo ɔl o didi atuwe, ma alal zinzeeti o, ka zin ojokta kaal o aterkedekuŋ Jooi dook.

Aterkedeket Jooi ageet rogzen

¹³ Aada di zɔɔz baal aduwak Jooi Ibrayim e. Iitene nice aterkedek niini Ibrayim gi ci ka kutuguwek ŋaati itooni niini zaar ogin maany, eeci akom eet ci ajuk nɔɔnɔ diŋdiŋonta. ¹⁴ Iitene nice anek Jooi Ibrayim ne, “Didile nyan kuduwayin ineet. Kamayukin waanma, ma kanyin dɔl ci meel ɔrɔɔt.” ¹⁵ Erewo ni waanice Ibrayim zinize ci alal zee makacin didi ojowa niini gi o aterkedek Jooi nɔɔnɔ.

¹⁶ Gɔɔn mā arɔŋ eeti kidica zɔɔz gone oman, itoon niini zaar ci eet ci adikir ŋaatin ka kidicai jore cineeŋ o. ¹⁷ Ma Jooi arɔŋ ɔl o aterkedek niini zoozok kagaac ɔrɔɔt ele niini alaŋ owo bodo zɔɔz cin been neen giye o aterkedek niini nɔɔgo ŋaati itooni zaar ogin. ¹⁸ Anyak zin kaal ceen ram calaŋ ookci been neen ce, terkediin onin been zaar ogin. Alaŋ Jooi avɔlɔŋ kaale ceen ram noko. Giye ci akati kaal ceen ram noko naaga o kodokonycozek Jook, ma kɔɔt kebekte, anyozoyet ageet moozet, ma kojokta naaga dɔyiz ci adɔi kak ŋaaten terkediin o aduwaket niini ageet zaare ogin. ¹⁹ Ma terkediin o rogzen ona anyek zinzeeti ogaac moozet kodoyit kiyo keet o adikir acabin kavooli o liilu liiltoga o. Ma gi o terkediin o rogzen ona anyek zinzeeti ogaac kiitazɔ, ma oromet ageet ki Jook baliinte onin. ²⁰ Ma Yesu araye ook ŋinaante ka kook kokoleyet ageet gɔl ci kavɔyi Joowa. Izi niini zin alaan ci adikir nɔkɔ zee been neen gole ci abil kiyo o alaan baal kazi Melikizadek e.

Adiŋdiŋ Yesu kujuk alaŋ o ceez o Joowo dook

7 ¹ Baale Melikizadek alaan ci kutur o kazi Salaam, ma een buk niini alaan ci agoonek Jook todoyok. Ma iitene baal abadaan Ibrayim gaŋnye baal akɔ amɔgi alaŋ e, urumek Melikizadek nɔɔnɔ gɔl, ma amayuk nɔɔnɔ. ² Anyek ni Ibrayim nɔɔnɔ lelen codoi lelenete ween amɔtɔ kaale baal akɔ ɔra niini alaate baal aganyak atenoŋ onin e. Ma zaara ci kazi Melikizadek noko anyak keŋti ram. Keŋ ci oowu o kazi ne Alaan ci Abon. Ma bodo giye baal eene niini alaan o kutur o kazi Salaam, akatozek nɔɔnɔ zaara ci kazi Alaan o Ganonto. ³ Mazin buk warage o Joowo ŋaan kuduwa zaar ci baati Melikizadek ki yaatin ki jijitin. Ma alaŋ aduwa buk iiten ci da aritan niini been iiten ci da adaŋni. Atobo zin niini kibeŋ ŋeerti Joowo, eeci een niini alaan nɔkɔ been neen kiyo ŋeerti Joowo o.

⁴ Icinit zin di alaazet ci baal Melikizadek o appe ɔrɔɔt. Mayo nuun een Ibrayim baal een jijitinaŋ o agayi ɔrɔɔt e, anyek nɔɔnɔ lelen codoi lelenete ween amɔtɔ kaale baal ɔra niini e dook, eeci aga Ibrayim nɔɔnɔ een niini didi alaan ci adikir. ⁵ Abaanit di gi ci akati alaŋ o ceez o Joowo. Eegin niigi alaŋ o ceez o Joowo giye o eegine niigi ɔl ci tatok o eet o kazi Livai. Aricanonek nɔɔgo lotinowa o Joowo ka kuluta gɔɔn niigi lelen codoi lelenete ween amɔtɔ ole ugeec Juz. Alota niigi kaal nicoko ole ugeec Juz maany, mayo nuun eegin niigi dook dɔl ci dɔl o Ibrayim o. ⁶ Mazin baale Melikizadek alaŋ een niini dole ci dɔl o Livai, ma bar olota niini lelen codoi lelenete ween amɔtɔ ŋaati Ibrayim. Ma amayuk buk niini Ibrayim baal ojowa terkediin o Joowo laadun e. ⁷ Gɔɔn zin laadun aga ɔl dook eeti ci amayuk gɔn, adikir niini ɔrɔɔt kujuk gɔn ci amayuk niini o. ⁸ Ma alaata ci baal gɔɔn alota lelen codoi lelenete ween amɔtɔ neke, niigi ɔl ci deer adaai labak. Bar zin warage o Joowo aneket ne, Melikizadek ci baal ajowa lelen codoi lelenete ween amɔtɔ neke, arogi niini nɔkɔ been neen. ⁹ Karabɔŋ buk inoko kanim naaga dook kiziti ne, Yo nuun een Livai ele ween baati alaŋ o gɔɔn alota kaal ɔla, uruyit buk niini kibeŋ dɔl ci dɔl ogin lelen codoi lelenete ween amɔtɔ kaale ugeec ŋaaten Ibrayim. ¹⁰ Eeci waanice niigi ŋaan kitirya ŋaan anyak jijitineeŋ Ibrayim nɔɔgo alya eecitɔ waan baal arumone niini kibeŋ Melikizadek e.

¹¹ Baale anyonek ɔl o Juz lotinowa o Joowo gole o dɔl o dɔl o Aron ween borit o Livai baal gɔɔn agoonek Jook todoyok e. Mā zin da gɔl nica kizimnyai kizi gɔl ci abon dook neen, alaŋ waan bodo naaga karɔŋ alaan oma ci ka kiiya. Karɔŋ zin naaga eet ceen alaan arɔnyai gole ci abil kiyo ci baal Melikizadek o, alaŋ een eet ci arɔnyai gole ci abil ki o Aron. ¹² Eeci mā ookci alaazet,

abon buk ookci lotinowa. ¹³ Ma zoowowa nici akati Manyi Yesu. Kaga zin naaga dook Kiristo baale alañ aritai bore o Livai, bar aritai niini waanice bore o Juda. ¹⁴ Ma baale Mosis ñaan kanyek ol ci bor o Juda liñliñon ci ka kanyeke niigi Jook todoyok. ¹⁵ Ma kaala ci kaduwa noko dook ayelzeket ageet gól o iyyai alaani oman ci atobó kibeena alaan baal kazi Melikizadek e. ¹⁶ Ma alaazet cine o alañ aku gole ci keerane o ol o deer, bar aku døyize o roget onin arogni niini nõko zee been neen. ¹⁷ Eeci buk warage o Joowo aduwa zóó ci akati nõõnõ azi ne, “Een niina alaan ci azóóze ol ñume onan nõko zee been neen gole ci abil kiyo baal alaan o kazi Melikizadek e.” ¹⁸⁻¹⁹ Otonñ zin Jooi lotinok o Mosis baal reen e, eeci lotinowa nica alañ arogz ol giye o akõmni nõõgõ døyiz ci ka kanyeke ol kobontai ñume o Joowo. Bar zin anyaaet Jooi ageet gól ci abon kujuk lotinok ogin baal reen e, ka kanyaawet niini ageet kivita kojõñozit nõõnõ. ²⁰ Aterket zin Jooi zóó nico ñaaten Yesu Kiristo. Maje alaate baal góõn agoonek Jook todoyok e, akõm codoi ñaatineenñ ci aterkedek Jooi terkediin ci abil kiyo nici noko. ²¹ Bar zin Yesu een niini alaan ci adikir gole ci aterkedeki Jooi nõõnõ zóó ci azi ne, “Naana o keen Jook keterkedeyin ineet ka izi alaan nõko kodot, ma alañ zóó cane o ookci nõko been neen.” ²² Mazin giye o aṅṅõwõne Yesu ki alaat dook, izi niini gól ci aterkedeki Jooi ol gi ci abon òòò kujuk baal reen e.

²³ Anyak zin bodo ñṅṅõwõnet oma ce. Baale góõn anyak alaat ci meel ger ci agoonek Jook todoyok, eeci waanice góõn mã adaai niigi, arigiz bodo ol ci bor o tatok uneenñ Livai liñliñon cineenñ o. ²⁴ Bar zin Yesu arogi niini nõko zee been neen, ma amena niini een alaan ci azóózi ol o tuwento ñume o Joowo nõko, ma akõm bodo alaat oogi ci ka kirigizit nõõnõ. ²⁵ Ma giye nico anyak niini døyiz ci arogzi ol o avunak Jook ñaaten nõõnõ nõko zee been neen, eeci niini alya arogi zee been neen. Ma ilalek niini Jook ñaaten nõõgõ.

²⁶ Nõõnõ zin doon o ka korogozet ageet giye o adowin niini been Jook, ma alañ anyak niini baciin codoi alye onin. Ooyi zin nõõnõ Jooi ñaa onin titiny tammu tadena ñaao akõm ol ci baciinowu. ²⁷ Maje alaata baal góõn agoonek Jook todoyok e, abon rak góõn baale ñaatineenñ ñaati agóõni óowa rak todoyok ci aarane oñe ci eleeti ugeec ele, ma bodo vurta agoonek Jook todoyok oñene ci ol oogi. Bar zin Yesu alañ agóõn nõko. Anyek niini ele onin kizi todoyoi lak codoi òòr nõko iiten baal adaañni keete ween talakec e doon.

²⁸ Ma baale lotinowa o Mosis aróõña ol calañ azima eleeti, ma anyek kizi alaat ci agoonek Jook todoyok. Ma bar vurta eterket Jooi zóó ci ka kanyeke niini ñeerin kizi alaan ci adikir, eeci akõma ñaatin baciinok nõko been neen.

Orogzet Jooi ageet gole ci colai

8 ¹ Inoko zin ñinti akati zóó cane kazóó o neen ce. Kanyak naaga alaan cinai adikir òòò, ma akõm ñaatin baciinok, ma aavi niini tammu tadena aziite o Joowo azo titiny kujuk viten dook. ² Baale góõn alaata o adikir ceeze o Joowo aliñliñonek niigi Jook ceeze ceen rum eenyca ol ci deer. Maje bar Yesu inoko o aliñliñ niini kizi alaan ci adikir ñaao aave Jooi ele. Ma nica ceez o eenyca Jooi alya, alañ eenyca ol ci deer. ³ Mazin góõn alaata o adikir dook arõnyai niigi ka kutuguzek Jook todoyok kibeena kaal o anyek ol nõõnõ oogi. Aganõ zin buk Yesu ween alaan onai adikir ñaati anyayi niini gi ci anyek Jook. ⁴ Inoko te da Yesu kizi gi ci aavi loota ñina, alañ waan een alaan ci agoonek Jook todoyok, eeci anyak alaat to ci agoonek Jook todoyok gole o lotinok o Mosis. ⁵ Mazin liñliñõnti ci agóõn alaata ci loocu o olla riritõn ci ayakza kaal o agooni tammu tadena. Abil kiyo baale ñaati Mosis e. Iitene baal aróõñ niini ka keteyai ceez o Joowo een rum e, anek waanice Jooi nõõnõ ne, “Cin di! Tugu kaal dook keelit gole baal kayelekin ineet baale be tadena e.” ⁶ Bar zin liñliñõnti o anyek Jooi Yesu adiññiñ òòò kujuk liñliñon o lotinowu reen baal alaat o adikir loocu e, eeci terkediin ci colai noko anyaa ganõn Joowa kibeena eete ci deer, ma adiññiñ òòò kujuk keerane o reen, eeci aterket niini kaal ci abon kujuk kaal baal reen e.

⁷ Ma da terkediin baal reen e kanyak døyiz ci arogzi ol, alañ waan bodo aduwaket Jooi terkediin ci colai. ⁸ Bar zin Jooi icinun kaal ci ger òla, makacin izi ne, “Kaduwakunñ igeet, tiñeere iinyaye ci avu neke kako katerkeda kibeena ol o Israyil been bor o Juda zóó ci colai. ⁹ Ma alañ nicini atobó ki gi baal katerkedei jijitigeec iitene baal kaarane nõõgõ looce o Masiru e. Waanice alañ arek niigi zinzeeti gi baal katerkedei naana nõõgõ e. Makacin kóõra nõõgõ. ¹⁰ Ceeni zin terkediin o colai o ka kutuguwek naana ol o Israyil iinyaye ci avu noko. Kareke iima nõõgõ lotinok ogan zinzeeti ugeec, ma kanyi nõõgõ kabaabanit lotinok nicoko ootine ugeec. Keen iima Jook cineenñ, ma eegin niigi ol cigan. ¹¹ Alañ bodo tiñeere eeti oman ñaatineenñ ademez góõñi oogi, karabõñ anek ol cigin ne, Agaac Jook, eeci ñaan tiñeere agayan ol dook o celbez been o titiny buk. ¹² Kooññei iima nõõgõ kaal baal ger agóõn e, ma alañ bodo kaada been neen.”

¹³ Mazin Jooi zoote ci aduwa noko, anyek niini terkediin ci colai noko kirigiz zóó ci terkediin baal reen e. Inoko zin gi baal aterkedi baal reena e oṅorei niini kibeena kaal o reen dook.

Anyaaet Yesu gól ci colai ka kidiññiñanti Jook

9 ¹ Baale rak anyak ol golok ci adiññiñani Jook terkediinte baal oowu e, ma anyak buk ceez ceen rum adiññiñani niigi nõõnõ loota ñina. ² Ma ñinita ceez ceen rum ci anyak eecitõ keñti ram ci aṅer ol ruma. Ma keñ ci oowu o kazi zaar ne ñin o Alile. Ma arek niigi ñinito lamba ci een warki, ki tarabeza ci ka kariyek ol ðõken o góõn ataabi niigi Jook. ³ Bodo keñ ci ano gón o awo ol zaar ci kazi ñin o Alile Òòò. ⁴ Ma keñ nici tatoga anyak tarabeza ci aruk ol warkine ci góõn arureke ol karkaret goo ka kóõñõñ madiz. Maje keñ nici eecitõ anyak loidõñ o Joowo o aruwe warkine buk. Ma anyak loidõñi nici eecitõ iju ceen warki ci anyak dayiin baal anyek Jooi Mosis kibeena ol o Israyil balala e. Ma anyak buk eecitõ keet o eet o kazi Aron alaazetu, ma alizna keete nico bõlowa. Ma buk anyak loidõñi nici eecitõ biyen ci zabal agirgir ram ci ayeedonek nõõgõ dook lotinowa ween amóõ. ⁵ Maje loidõñe nico tadena eel riritonowa raman ci toonnyak o Joowo kazi Cerubim o ayelzak ol gi o aave Jooi to ñinaante. Maje tabana cigeec o abiil ñino aparane alaaata biye ka kaarai Jooi ol baciinok ugeec. Bar zin inoko akõmnan wanj ci ka kuduwakunñ keñti ci kaal nicoko dook.

⁶ Mazi baale góõn ma óòt aryek niigi kaal nicoko dook viten ugeec odota, avó alaata iinya dook ceez keñe o oowu kazi ñin o Alile ka kóòt kilinñiñit niigi liñliñonok ugeec. ⁷ Ma keñe ci kazi ñin o Alile Òòò noko, akó alaani o adikir doon lak codoi nõko irkite codoi. Akóyi niini biye ci todoyoito, ma akó anyek Jook ka kaarai Jooi nõõnõ óowa rak baciinok o ele onin, kibeena baciinok o góõn agóõn ol ñaati alan agawi. ⁸ Ma kaale nicoko ayelzeket ageet Võñji o Joowo gi ci iinyaye niceke ñaan kóõñõñ gól o ka kooti ol ceeze ween rum ñaao kazi ñin o Alile Òòò eecitõ. ⁹ Ma ayeleket buk ageet gi ci biyeta ci todoyowu kibeena kaal o anyek ol Jook oogi alañ oony ol zinzeeti kitaliza. Eeci kaal ci baal agooni baale neke dook riritonok ki yabziin ci kaal ci agooni inoko o. ¹⁰ Ma kaala ci baal agóõn ol baale neke keerit ci kaal o kadak, ki kaal o kawot, ki keerit o adewan ol eleeti monkotai ki burutaninnet. Olla zin kaal nicaga lotinok ci agóõni ol eleeti eci bitaalu doon, ka olla kereyoi niigi zee been iiten o aku adaakni Yesu. Zin gole nico okoleyet niini ageet gól ci abon kujuk nice.

¹¹ Iiya zin Kiristo izi alaan ci adikir ceeze o Joowo, ma anyaayet niini ageet gəl ci abon kanyak naaga inoko noko. Alinliŋ niini inoko tammu tadena, ma ŋnita adiŋdiŋ, ma azimnyai ɔɔt kujuk ceez ween rum baal gɔɔn ɛɛnyca ɔl o deer loota ŋina e, eeci ŋnita alaŋ ɛɛnyca ɛeti ci deer, ma alaŋ een ŋinti loocu ŋina. ¹² Baale zin ook Yesu ŋaao Joowo alile ɔɔt lak codoi ɗɔr nɔkɔ. Ma alaŋ bodo abedonek nɔkɔ been neen. Alaŋ akɔyi niini waanice biye ci konyo, karabɔŋ een ci arizo ka kook kataabi Jook. Bar akɔyi niini waanice biye o ele onin ele, ma ojowayet niini ageet roget o abil been neen. ¹³ Baale gɔɔn alaata o ceez o Joowo loota ŋina avɔyi biye ci konyo ki ci arizo. Buk gɔɔn baale avaat niigi mool ci ŋaai zee ma een buur doon. Aryek ni buur nico maam, ma avɔ aparane niigi kaal nicoko dook ɔl o anyak baciinok ka kaaryai nɔɔgɔ baciinowa ugeecik ka kobonta ŋume o Joowo. ¹⁴ Iziikto zin juruŋ. Zin mā da anyak biyeta ci konyo ki ci arizo dɔyiz ci aarane ɔl oŋe baale, anyak zin bar biyeta o Yesu dɔyiz ci appe ɔɔt ele ci aarane baciinok ɔla kobonta ŋume o Joowo. Anyek niini ele onin kizi todoyoi ŋaaten Jook tirtente o Vɔŋiz o Joowo abil been neen. Ma gole nico anyek niini zinzeeti ogaac kiziti vɔɔɛ ka calaŋ bodo kagɔɔn naaga kaal ci ger avoyet daayiza, bar ka koneec naaga Jook o anyak roget. ¹⁵ Kaga zin naaga Yesu neen o ilalek Jook ŋaaten ageet, ma anyaaket niini ageet terkediin ci colai ka ɔl o aŋera Jooi dook kojokta niigi kaal o abon o aterkedek Jooi nɔɔgɔ ka kanyek. Ka zin kanyayit niigi kaal nicoko nɔkɔ zee been neen. Ma kaala nici katin didi agooni, eeci Yesu adaawa. Ma daayizi onine aara ɔl baciinok ugeec baal gɔɔn agɔɔn baale waan baal ŋaan anowi niigi gəl o terkediin o reen e.

¹⁶ Gɔɔn mā ivatek ɛeti ɔl kaal, agɔɔn ɔl kaal ci ona ivatek niini nɔɔgɔ o vurta, ma adaak niini. ¹⁷ Eeci vatinet maŋaan rak ɛeti arogi o alaŋ anyak dɔyiz, bar zin mazi adaak niini, adɔi vatinet onine kak. ¹⁸ Gi zin buk o gɔɔn baale keerita baal agɔɔn ɔl ɔɔwa e abon ŋaati atɔŋdi ɔl kɔny ki ariz e neen. ¹⁹ Baale aduwak Mosis ɔl lotinok baal anyek Jooi nɔɔnɔ e dook zee ma vurta odoma ni niini keet ci minmin acabek im ci azeetu, ma ajukek maam ci acano ki biye ci maalawu kibeen ci bawonu eecito. Ma aparane niini kaal nicoko warage o lotinok o Joowo been ɔl dook. ²⁰ Ma azi waanice Mosis ne, “Nicigi biye o ayelza gi o aterket Jooi kibeen ɔl neen.” ²¹ Ma buk aparane niini biye nicoko ceez ween rum been kaal dook o alinliŋ ɔl ŋaati adiŋdiŋani niigi Jook. ²² Ma didi oonyi kaala ci meel kitiliza biyete, eo aduwan lotinowa o reen. Mazin lotinowe o reen alaŋ aaryai baciinowa kɔkɔm biye ci aduuti.

Daayiz o Yesu ɛene todoyoi o aara baciinok

²³ Zin waanice agano ŋaati aduuti niigi biye gole nico, ka kanycek niigi kaal ci eegin riritonok o kaal o eel tammu tadena noko kobonta ŋume o Joowo. ²⁴ Kiristo ŋaan kook ŋaao kazi Iŋin o Alile ɔɔt baal ɛɛnyca ɔl o deer azeeene e. Ma ŋnita ririton ci ŋin ween didi o abil ŋaao abaayi Jooi tammu tadena. Ook zin Yesu ŋinaante ele, ma inoko abil niini ŋume o Joowo, ma ilalek nɔɔnɔ ŋaaten ageet. ²⁵ Baale gɔɔn alaata o adikir ceeze o Joowo loota ŋina avɔ ŋaao kazi Iŋin o Alile ɔɔt eecito lak codoi irkitok dook. Avɔyi niigi biye ci arizo kibeen ci konyo. Bar zin Yesu waanice ooyi niini biye o ele onin lak codoi ɗɔr nɔkɔ. ²⁶ Mā da kanyek Yesu ele kizi todoyoi lak ci meelik, adaak waan buk niini lak ci meelik ŋin baal ɛɛnycan Jooi looc e dook. Bar zin iyyak niini looc lak codoi ɗɔr nɔkɔ ka kiiya kanyek ɔl o loocu kobonta gole o colai. Anyek niini ele onin kizi todoyoi lak codoi ɗɔr nɔkɔ ka kaara baciinok dook lai. ²⁷ Iziikto di! ɔl dook adaa lak codoi, ma bodo vurta avɔ niigi payiinte o Joowo. ²⁸ Ma buk gole nico iya adaak Yesu lak codoi ɗɔr nɔkɔ, ka kaara baciinok ci ɔl ci meelik ger. Iŋaan zin abadaak bodo niini looc iima. Alaŋ zin bar bodo ka kiiya kaara baciinok, bar ka kiiya korogoz ɔl o are niigi nɔɔnɔ.

10 ¹ Ma lotinowa o ɔl o Juz baal adiŋdiŋani niigi Jook e atobo olla ki ririton ci kaal ci abon ka kivita. Bar alaŋ ayelzaket ageet kaal ci abon ka kivita katin o juruŋ. Baale gɔɔn azi lotinowa ne, “Abon agoonek ɔl Jook todoyok irkitok dook nɔkɔ.” Zin gole nico lotinowa nica alaŋ aara ɔl baciinok kitiliza zinzeeti been neen. ² Mā da todoyowa nica kanycek ɔl kitiliza zinzeeti, alaŋ waan bodo ɔl acirit zinzeeti baciinowe ugeec, ma oŋortei waan buk todoyowa dook.

³ Bar zin todoyowa ci baal gɔɔn agɔɔn niigi irkitok dook neke, anyek nɔɔgɔ kaada baciinok ugeec. ⁴ Eeci biyeta ci arzenu ki ci bawonu alaŋ anim kaarya baciinok ɔla. ⁵ Ma giye nico waanbaal akunake Yesu looc alye o eet o deer e anek niini Jook ne, “Alaŋ arooŋ bodo niina todoyok ci ɛɛzawu, karabɔŋ een ci tiinu ka kanycin ɔl ineet. ⁶ Alaŋ atal niina todoyok ci avaat ɔl ka kaara baciinok, bar idimanu niina ele onan ka kizi naana todoyoi cun. ⁷ Cin di baaba, kakun ka kiiya kutugu kaal o arooŋekan niina aneet kutugu, kiyo ayeedi waragewe unun o.” ⁸ Aduwa zin Yesu zɔɔz nico, azi rak ɔɔwa ne, “Alaŋ arooŋ bodo niina todoyok ki kaal oogi ci ka kanycin ɔl ineet. Alaŋ atal niina todoyok ci avaat ɔl ka kaara baciinok.” Mayo nuun baale agɔɔn ɔl kaal o aduwa lotinowa o Juz e, aduwa Yesu kaal nicoko nɔkɔ. ⁹ Ma bodo vurta azi ne, “Cin di! Kakun naana ka kiiya kutugu kaal o arooŋekan niina aneet kutugu.” Zin gole nico aara Yesu todoyok baal gɔɔn agɔɔn ɔl e dook lai, ma irigizek niini ele onin kizi todoyoi keete ween talakec. ¹⁰ Utugu niini gi o arooŋek Jooi nɔɔnɔ kutugu, ma aarawet niini ageet baciinok ogaac giye o anyeke ele onin kadaak keete ween talakec. Gole nico otoonyet niini ageet daayize onin kobonta lak codoi ɗɔr nɔkɔ.

¹¹ Baale alaata o Juz baal gɔɔn agoonek Jook todoyok e, agoonek niigi Jook todoyok gole codoi ɗɔr nɔkɔ iinya dook lak ci meelik ger, bar zin todoyowa nica alaŋ anyak dɔyiz ci aarane baciinok ɔla. ¹² Maje Yesu Kiristo agɔɔn niini todoyoi codoi ɗɔr nɔkɔ. Ma todoyoit nica anyak dɔyiz ci aarane baciinok baal agɔɔn ɔl e lai calaŋ abedonek bodo nɔkɔ zee been neen. Ma vurte baal utuguwi niini todoyoi onin odot e, ook aavu loota aziite o Joowo azo titiny tammu tadena. ¹³ Inoko zin areyi niini ŋinaante zee ma anyek Jooi nɔɔnɔ korocek mirɔk o amarnin nɔɔnɔ dook looc zɔɔne. ¹⁴ Ka zin gole o ɛene niini todoyoi o adoi ɗɔr, ka buk kanyek ɔl o aaryai baciinowa ugeec kobonta kiyo niini o nɔkɔ zee been neen.

¹⁵ Ma buk Vɔŋizi o Joowo ayeleket ageet kaala nici aleemnyai didi. ¹⁶ Aduwa niini ɔɔwa gi ci ane Jooi ne, “Ceeni zɔɔz ci colai ci ka keterkeda naana kibeen ɔl o Israyil iinyaye ci avu noko. Kareke iima naana nɔɔgɔ lotinok ogan zinzeeti ugeec, ma kanyi nɔɔgɔ kabaabanit lotinok nicoko ootine ugeec.” ¹⁷ Ma azi bodo ne, “Alaŋ bodo katin kaada baciinok ugeec baal agɔɔn e been neen.” ¹⁸ Zin giye o aarane Jooi baciinok dook ɔla ŋaaten Yesu, alaŋaan bodo inoko arooŋnyi todoyowa ci ka kaaryai ɔl baciinowa.

Abon kajɔŋɔz Jook

¹⁹ Gɔtɔnɔga o tuwento, inoko kanyayit naaga moozet ci kavɔyi ŋaao Joowo alile ɔɔt, eeci uduut Yesu biye ogin ŋaaten ageet. ²⁰ Okolayet niini ageet gəl ci rogeto colai alye onin, ka kɔɔt naaga ŋaao o Joowo alile labak. ²¹ Kanyak zin naaga nɔɔnɔ ween alaan o ceez o Joowo adikir o abal ɔl o Joowo. ²² Abon zin naaga kavunak Jook zinzeetine ceen didi ki tuwente ci adɔi kak. Eeci zinzeeti cigaac o otoonyce iziti vɔɔɛ kaale o ger kabaca, ma otoonyce eleeti cigaac o kɔkɔm ririny maame ci liilim. ²³ Keelit zin naaga kuruktek zɔɔ looc kodoyit kak, kereec kaal baal katu e dook kɔkɔm zinzeeti mɔɔtiz giye o kuduktai naaga utugetine ogaac zɔɔz o kagamtai Jook zinzeetine ogaac dook, eeci aterkedeket Jooi ageet kaal o ŋaan agɔɔn niini katin, ma didi agɔɔn niini katin kaal niceke. ²⁴ Koromte kereezo ka kitiritto naaga dook, keyeliza rɛɛzɔnet ɔla, ma kagɔɔn bonat. ²⁵ Alaŋ abon ŋaati kaborni romen

ci kaloten ɲaatodoi kiyo gɔɔn abor ɔl ogen ɲaati aloten ɲaatodoi o. Bar abon adizkonu niiga dook, eeci kaga naaga izi iiteni o ka kabadai Manyi ona ajɔn ɔɔɔt.

²⁶ Inoko naaga kagaac kaal nicoko dook. Zin mā abaca ɛeti codoi ɲaatina oɲe loror, kaga zɔɔz ween didi nɔkɔ ɔkɔma bodo todoyok ci agooni kiyo baal agɔɔn Yesu e ka kaara nɔɔnɔ baciinok cigin o. ²⁷ Mā abaca ɛeti gi ci ger nɔkɔ, anycek nɔɔnɔ kivir ziniz, eeci iima aku apayek Jooi nɔɔnɔ oɲec, ma avaat niini gooye ceen lɔtɔn ɔl dook o amarnin nɔɔnɔ. ²⁸ Gɔɔn baale ma alaɲ azii ɛeti lotinok o Mosis, ma eegin ɔl raman karabɔɲ ɔl iiyon bacok kaale ci ger agɔɔn niini o, aruk ɔl nɔɔnɔ kadaak calaɲ awucnek niini nɔɔɔɔ been neen. ²⁹ Mazin bar ɛeti ci apez ɲeerti Joowo, rooni ki payiin cin gerze katin ɔɔɔt ele ɲaatin, eeci ɛeti nici anyek niini biye o Kiristo baal oonyi nɔɔnɔ kobona kɔkɔm oɲec e kizi gi ci labak. Ma adɔm buk niini Vɔɲiz o Joowo anyaa nɔɔnɔ deten. ³⁰ Kaga zin naaga apayek Jooi ɔl o ger gerzitin. Azi niini waragewe onin ne, “Kacace katin. Kagoonei waanma ɔl kaal ci atobo been kaal o ger agɔɔn niigi.” Ma azi buk warage o Joowo ɲaaman ne, “ɲaan Jooi apak ɔl ogin.” ³¹ Agaac niiga mā akunak ɛeti ɲum o Jook o arogi ka kiiya kapaye, anyak zɔɔz nici ɲoliin ci appe ɔɔɔt.

³² Aada di iinya baal ɲaan agamanu zɔɔz o Joowo e. Iinyaye niceke adoi igeet zinzeeti ugooc mayo nuun apirnanu e. ³³ Adomnyuɲ gɔɔn waanice ɔl igeet kɔla, ma anyuɲ niigi igeet piryakzet ci appe, ma waanice oromtozeyu niiga ɔl baal gɔɔn apirna buk e. ³⁴ Ozoltu waanice niiga kibeem gonogu o tuwento baal acabje e piryakzet uneen. Ma agamtawu talniinta gi ci ka kaamtayun ɔl igeet kaal ugooc lai labak, eeci agayu niiga ɲaan avɔ anyaku kaal ci abon kujuk nicoko tammu tadena ci ɛel kodot, ma alaɲ adicai been neen. ³⁵ Má anyeku zin kiliitawuɲ tuwen unoɲ Joowa, eeci ɔl o azooni tuwen uneen, ajowa katin niigi vɔyit ci appe ɔɔɔt Joowa. ³⁶ Abon anyeku zinzeeti kodoyit tuwenta ka utuguz kaal ci anyek Jook katalɔ, ka zin ojokta niiga gi o aterkedekun Jooi. ³⁷ Azi Jooi waragewe onin ne, “ɲintimiliny ɲaan aku ɛeti o ka kiiya. Aku niini taman. Alaɲ aavi ɲinti reen. ³⁸ Ma ɔl ogane abon ɲaan katin arogi, eeci atu niigi zozok nicoko. Bar mazi amiiri codoi ɲaatineen ki vurut ɲaati anoyan aneet, alaɲ koca naana katalne ɲaatin.” ³⁹ Alaɲ zin naaga keegin ɔl ci ka kimiirte ki vurut ka kokolozte. Bar naaga kutuyo, ma eelawet Jooi ageet.

ɔl o anyak tuwen ween didi

11 ¹ Keɲ o tuwen o katuwi Jook neen ce. Mā katu naaga gi ci katu, kaga nɔkɔ kavɔ kajowa katin gi ci kare neke. Kaga buk naaga kaal o alaɲ kacin inoko, ɲedet ɛel tɔ. ² Baale ɔl baal reen e anyek niigi Jook katalɔ ɔɔɔt, eeci atu niigi nɔɔnɔ.

³ Ma giye o kutuyi naaga Jook, kagaac naaga didi da baale ɛenya Jooi looc ɲaati aduwan olla zɔɔz otoga doon. ɛenya niini kaalyan ci kacin loota noko dook kaale calaɲ naaga kacin.

⁴ Baale tuwen neen baal anyek eet o kazi Abel kataap Jook todoyoite ci abon kujuk taabinet o gɔtɔni o kazi Ken e. Ma anyek waanice Abel Jook katalɔ, eeci atu niini nɔɔnɔ. Izi ni Jooi ne, Niini eet ci abon. Ayelzeket zin Jooi ageet gi o atalnin niini ɲaati Abel giye o agaman niini taabinet onin. Mayo nuun adaak baale Abel e, ɲaan ademezet tuwen onine ageet nɔkɔ.

⁵ Baale giye o atuwi ɛeti o kazi Inok Jook, iyit Jooi nɔɔnɔ rogetet ooyi tammu tadena. Ma akɔm bodo eet ci icinun nɔɔnɔ been neen, eeci ooyi Jooi nɔɔnɔ tammu tadena. Azi zin warage o Joowo ne, “Maɲaan Inok kook tammu tadena e, atalne Jooi ɲaatin.”

⁶ Akɔm zin laadun eet ci anyek Jook katalɔ, mā ɔkɔm nɔɔnɔ tuwen Joowa. Mā arɔɔɲ eeti kiiya kɔɲɔɲz Jook, abon anyak niini tuwen ci agawi Jook aavi tɔ didi. Ma Jooi agoonek kaal ci abon ɔl o ajal arɔɔɲ nɔɔnɔ.

⁷ Baale giye baal atuwi ɛeti o kazi Nowa Jook, iziik waanice niini kaal baal ilotek Jooi nɔɔnɔ ka kook kutugu e. Mayo nuun ɲaan kicin niini kaal niceke e, ozooti niini zɔɔz o Joowo. Makacin ɛteɛnya kavool baal ka korogti niini ki ɔl o tatok onin dook tawana e. Ma tuwen onine ayelza gerzitin ci ɔl o loocu iinya niceke. Ma ojowa niini waanice bonat ɲume o Joowo giye o atuwi niini nɔɔnɔ.

⁸ Baale buk giye baal atuwen ɛeti o kazi Ibrayim, agama niini zɔɔz o Joowo iitene baal aduwaki Jooi nɔɔnɔ ka kuluugi kooyi looce baal aterkedek niini nɔɔnɔ e. Otoɲ ni niini waanice looc onin, ma iɲaaz akɔ ɲaati alaɲ aga been neen. ⁹ Ma akɔ abaak looce ci baal aterkedek nɔɔnɔ Jooi neke kiyo miroiti o, eeci anyak niini tuwen. Ma abaak waanice niini ceezine ween rumanɛ o buk iiya abaai bodo Aizak kibeem ɲeerin o kazi Jakob baal azɔl buk ki nɔɔnɔ terkediin o Joowo e. ¹⁰ Maje Ibrayim niinilya waanice are kutur o titiny o ɛenyet Jooi, ma abil kodot tammu tadena.

¹¹ Baale buk giye o atuwen Ibrayim, anyek Jooi nɔɔnɔ kibeem ɲaa onin kazi Sara baal awɔ koliin zɛɛ makacin izi matuwoc e, kitirta dole cineen kiziti matuwoc nɔkɔ. Agooni gi nica nɔkɔ o, eeci atu Ibrayim gi o ɛterket Jooi agooni didi. ¹² Enice Ibrayim anyatun ɔɔɔt ele. Mayo nuun anyat waanice niini ɔɔɔt neke, anyawun logoz kanyat nɔkɔ. Ma iiya buk anyawun niini dɔl ci dolenu ci meel ger logote nico. Makacin dɔlya ci dɔl ogin izi meelee ger kiyo monyonya o ɛel tammu keɲa o, ma atobo ki kazac o ɛel liiltoga alaɲ kanim kekeebit o.

¹³ Ma ɔl nicaga baale atu niigi Jook ɔɔɔt nɔkɔ zɛɛ ma adaai imin, mayo nuun waanice niigilya ɲaan kagamit kaal o aterkedek Jooi nɔɔɔɔ azeene ugeec e. Bar olla niigi aga kaal niceke zinzeetine ugeec, ma atalne. Ma anɔ ne, “Keegin naaga mirɔk, ma akom ɲintina loota ɲina.” ¹⁴ Ma ɔl ci baal aduwa zozok nicoko neke, ayelzak niigi ɔl oogi gi ci arɔɔɲi niigi kutur cineen een didi ci eleeti ugeec ele doon. ¹⁵ Ma alaɲ bodo abaaban niigi ɲinbaal avuni baale e. Mā da kabaabanit ɲinbaal avuni baale e, ojokta waan gɔl ci amiironeke ɲinite. ¹⁶ Bar zin waanice arɔɔɲ niigi kutur o titiny abil tammu tadena kujuk ɲinbaal abaai baale e. Atalne zin Jooi ɲaatineen ɲaati awe niigi nɔɔnɔ kizi Jook uneen, ma ɛteɛnyak niini nɔɔɔɔ kutur cineen titiny giye nico.

¹⁷ Baale giye o atuwen Ibrayim iiten baal acinan Jooi nɔɔnɔ e, agama niini labak ka kutuguwek ɲeerin Aizak Jook kizi todoyoi. Ma waanice Aizak adoi ɲɔr nɔkɔ ɲaati Ibrayim. ¹⁸ Maje rak baale aterkedek Jooi Ibrayim gi ci anek ne, “Dɔlya ci dɔl cugun aritai katin ɲaaten Aizak.” ¹⁹ Ma bodo buk Ibrayim aga nɔkɔ Jooi anyak dɔyiz ci adɔɲan ɔl daayiza. Zin waanice didi makacin kizik bar abadake Jooi nɔɔnɔ Aizak daayiza.

²⁰ Baale giye baal atuwi Aizak Jook, amayuk niini lɔɔz ogin kazi Jakob been Eso, ma aduwak nɔɔɔɔ gi o ka kanyek Jooi nɔɔɔɔ katin.

²¹ Baale giye baal atuwi Jakob Jook, amayuk niini waanice lɔɔz o ɲeerin o kazi Josev dook waanbaal anyati niini ka kadaai e. Ma adiɲɲan niini waanice Jook ɲaati itiren keete onin omtinto.

²² Baale giye baal atuwi Josev Jook, akɔ waanice mazi adadjai ka kadaak e, uduwa zɔɔz ci akati iiten ci katin aluugi ɔl ogine Israyil looce o Masiru. Ma ivatek niini nɔɔɔɔ, ma aduwak ɲinti ka kitanɲi niigi nɔɔnɔ ɲaati aluugonek neke iitene ci anyatni.

²³ Baale giye baal atuwi baati eet o kazi Mosis ki yaatin Jook, akɔ waanice mazi acin niigi nɔɔnɔ abon ɔɔɔt nɔkɔ, oroodit niigi nɔɔnɔ ceeza nyelowe iiyu iiten baal aritan e. Ma alaɲ azii niigi zɔɔz o ane alaani o looc nice ne, “Abon aruk ɔl dɔl o mac aritai dook kadaayitɔ.”

²⁴ Baale giye baal atuwi Mosis Jook, akɔ mazi idikir e alaŋ arɔŋ niini ɔl kotoweec nɔnɔ kizi ɲerti tinati alaani o Masiru. ²⁵ Ma abaaban niini azi ne, “Abon kapirana ki ɔl o Joowo. Maya nici kujuk talniin o oŋenu adicai taman.” ²⁶ Agama niini piryakzet, eeci aga niini ɲaan itoona Jooi Kiristo katin. Maya nici kujuk arɔkzet o anyak niini looce o Masiru, eeci aavek niini gi o abon o ka kojowa ɲaaten Jook katin.

²⁷ Buk giye o atuwi Mosis Jook, uluuk niini Masire. Mayo nuun abornek alaani o Masiru nɔnɔ nɔŋ e, alaŋ niini anyak ɲoliin. Abil niini kodɔk calaŋ abarit kiyo eeti o icinun Jook o alaŋ ɔl o deer dook keberene ugeec acin o.

²⁸ Bodo buk zin giye o atuwi Mosis Jook, uduwak niini ɔl ka keela eleeti toonnaite o Joowo anyaa daayiz. Nɔnɔ nɛen o aricanek ɔl o Israyil koŋonycek biye ceezi ugeec tatoknya ka ma aku toonnaite nica, ka calaŋ aruk dɔl ugeec een abuunya.

²⁹ Baale buk giye o atuwi ɔl o Israyil Jook, abaayizit niigi waanice liil o adikir kazi Liil o Meeri caavai kiyo awɔ dɔwɔna o. Mazi waanice anowa ɔl o Masiru nɔnɔ arɔŋ ka buk kabaayizit liil ka kɔɔt kalamta nɔnɔ, avɔ ma liil keŋa ukuu liili nɔnɔ kutudude niigi dook lai.

³⁰ Baale buk giye o atuwi ɔl o Israyil Jook, ɔɔt otonozo niigi kutur o kazi Jeriko iinya torgerem ebaal aduwaki Jooi nɔnɔ e zee makacin uruk kaluwa ween be aliya kutur nice looc.

³¹ Baale buk giye o atuwi ɲaa o kazi Reyab baal een waanɲai e Jook, waanice ma avɔ adaai ɔl o kutur nice giye o aborni niigi Jook e, ɲaan niini ki ɔl o tatok onin kadaayitɔ, eeci waanice atirit niini ɔl o Israyil baal avɔ arɔɔt ɔl kuture o Jeriko e.

³² Inoko zin karooŋ ka koŋorei ɲina, eeci akomnan waŋi ci ka kuduwakun igeet zoosok o akati ɔl niceke dook kiyo Gidiyon ki Baarak ki Samson ki Jabta ki Devid ki Samwel been nyakananet dook baal azɔɔz zoosok o Joowo e. ³³ Baale giye o atuwi ɔl nicigi Jook, utuguzɔ niigi kaal ci meel arɔɔt. Ɖɔɔ waanice oŋen ɲaatineeŋ ki moden oogi, ma amɔk niigi nɔnɔ dook lai. Ma abal oŋen ɲaatineeŋ ɔl gole ci abon. Ma ajowa oŋen ɲaatineeŋ buk kaal o aterkedek Jooi nɔnɔ. Ma anyek oŋen ɲaatineeŋ maat kumute utugeti tuwente uneeŋ calaŋ anim maata kadayit nɔnɔ. ³⁴ Ajukek ɔl oogi ɲaatineeŋ goo ci alanyit kalakalak, ma alaŋ avaat nɔnɔ been nɛen. Ma azooni Jooi oogi ɲaatineeŋ modene o arɔŋ kakatit nɔnɔ dilanyai. Mayo nuun eegin niigi rak ɔɔwa baale roŋgenen e, anyek Jooi nɔnɔ dɔyiz. Makacin iziti niigi ɔl ci adɔi oroonto, ma amɔk moden dook. ³⁵ Ma buk baale giye o atuwi ɲaai oŋen Jook, icinit niigi ɔl ugeec baal adaai e ɲaati ɲaani daayiza. Maje ɔl ci mac oŋen waanice gɔɔn aruk ɔl nɔnɔ zee makacin adaayitɔ giye o alaŋ arɔŋni niigi kadaŋti Jook ka kotoŋit ɔl nɔnɔ, eeci arɔŋni niigi ka kitingazɔ daayiza kɔɔt korogit tamma. ³⁶ Ɖl oŋene waanice apirna ɲaati amomozɔ ɔl, ma aruk ɔl nɔnɔ nyaboyen. Oogi ɲaatineeŋ acap ɔl ziiyi, ma ajukek ceez o cabiinto. ³⁷ Maje oogi ɲaatineeŋ avac ɔl biyene nɔkɔ zee been zel. Maje oogi ɲaatineeŋ atet ɔl rogetet nɔkɔ por. Maje oogi ɲaatineeŋ akat ɔl dilanyai kadaayitɔ. Maje oŋen ɲaatineeŋ amaata arɔɔt ele zee ma akom gi ci adak kina. Ma anyak niigi waanice piryakzet ci appe gidente o agidi ɔl nɔnɔ. ³⁸ Maje oŋene ajalaaŋ olla balalɔi kibeen biyene, ma avɔ abaak boɔtwani eecitɔ ki looknyai. Mazin ɔl nicigi bonate uneeŋ abonon arɔɔt, alaŋ waanice agano ɲaati abaai niigi loota ɲina.

³⁹ Zin waanice ɔl nicaga dook anyek Jook katalɔ, eeci atu niigi nɔnɔ. Bar zin waanice ɲaan niigi kojokta kaal baal atu niigi kizik ɲaan anyek Jooi nɔnɔ e. ⁴⁰ Eeci anyak Jooi baabani ci ka kurumnyet niini ageet kibeen ɔl ci baal atuwi baale neke ɲaatodoi ka zin kiziti naaga dook bor ci Joowo abon.

Abon kamez piryakzet kiyo Yesu o

12 ¹ Ma kɔle ci appe baal tuwento neke niigi ɔl ci ka kataŋaamteyet ageet tuwente onai katuwi Jook. Zin giye nico abon kaara naaga kaal o araŋraŋanet ageet gole o Joowo, kiyo baciinowa o adoonet ageet dɔyize uneeŋ o. Abon zin naaga kɔɔrɔŋni ci eleeti ogaac ɲaati kanowɔ gɔl o Joowo juruŋ tuwenta. ² Abon karek kebere ogaac Yesu o arayinet ageet gole o tuwen ona katuwi nɔnɔ. Nɔnɔ nɛen o anyek tuwen ona keleeme. Ma giye baal agawi niini talniin o are nɔnɔ tammu tadena, emez niini daayiz onin keete ween talakec. Ma anyek alyaan onin baal adaanɔni talakeca e kizi gi ci labak. Inoko zin waanico aavi niini aziite o Joowo azo titiny tammu tadena. ³ Abon di abaabanu juruŋ ziniz laliz onin iitene baal amarnin ɔl o oŋenu nɔnɔ arɔɔt e. Abaabanit nɔnɔ ka emeda niiga odoyit tuwenta calaŋ apirnanu, ma amiirenu ki vurut.

Ayeleket Jooi ageet gi o keegine naaga dɔl ogin didi

⁴ Ma giye ween didi ɲaan rak inoko arɔɔt niiga ki Loryen zee ma ka adaayit ɲaati amezu zinzeetine ci adɔi kaal o ger acinanun igeet. ⁵ Mā anyeku kerekteyun zoosowa o Joowo ilotun niini igeet ane ne, “Dɔl ogan, mā kagerneyekun igeet, iziiktaŋ. Mā abornu nɔŋ. ⁶ Eeci ɔl ogan kareez nɛen o kagerneye naana nɔnɔ, ma ɔl o kanyei naana kizi dɔl cigan, nɔnɔ nɛen o karooi.” ⁷ Abon zin gɔɔn niiga amezu gernyiin nico giye o baciinok ugooc, eeci gernyiin nici abil kiyo o gɔɔn agernyeke eeti dole onin ka kitirit nɔnɔ kɔɔt juruŋ o. ⁸ Mā alaŋ agamanu gi o agernyekun Jooi igeet baciinowe ugooc kiyo dɔlya ogine o, alaŋ zin koca eeginu niiga dɔl cigin een didi kiyo ɔl o tuwento baale e, bar koca eeginu bizirnya. ⁹ Gɔɔn baatigaac ween ɔl o deer loota ɲina mā agernyeket niigi ageet giye ci kabac, kaŋole naaga nɔnɔ. Abon zin bar kazii naaga baatina o aavi tammu tadena arɔɔt ka kojokta roget o abil been nɛen. ¹⁰ Gɔɔn baatigaac o aritanet loota ɲina agernyeket ɲintimiliny ter giye ci acin niigi ger ɲaatineeŋ. Bar zin Jooi agernyeket ageet ka kitiritet kotoŋit baciinok, ma kabona kiyo niini o. ¹¹ Gɔɔn iiten ci te agernyeket Jooi ageet o, mā kacin bar kizik gerze, ma kabor nɔŋ. Zin bar vurta gernyiin nici abona ole o agaac keŋ cin. Ma anyek nɔnɔ kutuguzɔ kaal ci abon, ma anyawɔ niigi ganon eleetine ugeec maany.

¹² Zin mā bar alacanu eleeti. Abon anyeku zinzeeti kodoyit tuwenta. ¹³ Anycek tuwen unooŋ kibil tɔp ka ɔl o miliny tuwen ɲaatonooŋ calaŋ bodo niigi amiiri ki vurut tuwente uneeŋ, bar koca atuwi juruŋ kodoyit.

Ooritnɔŋ abaayit juruŋ

¹⁴ Ooritnɔŋ dɔyize unooŋ dook abaayit ki ɔl dook juruŋ yaak. Ooritnɔŋ buk abaayit baayiz ci abon atalna Jooi, eeci mā alaŋ agɔɔn eeti nɔkɔ, alaŋ koca niini acin Jook. ¹⁵ Egenyit juruŋ ka kɔkɔm ɲaatonooŋ eet ci aboloz deten o Joowo. Buk egenyit edeya eleeti oŋene ka kɔkɔm ɲaatonooŋ eet ci atobɔ ki balaal o gɔɔn akaka kak ɲaati abɔrɔneke idi, makacin akakaac idina dook kak o. Ma eeti ci abil nɔkɔ uulal ɔl ci meelik ger, ma anyaa baɔn. ¹⁶ Bodo buk abon niiga agenyu ka kɔkɔm eet codoi ɲaatonooŋ ci adoma zoocmaz, karabɔŋ apez zoosok o Joowo kiyo baale eeti o kazi Eso e. Baale Eso niini abuu, ma bar acelbezan niini waanice kaal ogin baal abuuzetu e, ma ataalek gɔɔni ween tutur dayiine ci miliny ter. ¹⁷ Agayu zin niiga nɔnɔ bodo waanice vurta oroŋun niini baatin kitivatek nɔnɔ kaal giye o eene niini abuu. Bar baatine ujura. Ɖkɔma bodo nɔnɔ gɔl ci ka kabaliwi gi baal utugu e been nɛen, mayo nuun ilal Eso waanice luwanta arɔɔt e.

¹⁸ Abon zin niiga ooryunəŋ abaayit baayiz ci abon, eeci niiga alaŋ atobonu ki ɔ baal Israyil e. Avunak niigi waanice be o kazi Sinai, ma anim niigi kuumit be nice azeene ugeec labak. Mazi avu eel niigi waanice be loota, acin goo ci alanyit biya. Maje lɔɔci muur, ma ivaan ŋɔɔti ɔɔɔt ele. ¹⁹ Ma azii niigi toromba ci abe been molok ci azɔɔz. Ma mɔlɔyi ci azɔɔz noko anyek nɔɔgo kanyayit ŋoliin ɔɔɔt, ma ilalek niigi molok nico ka calaŋ azoozek nɔɔgo bodo. ²⁰ Azi mɔlɔyi nici ne, “Mā anyak eet ci deer uum be nico, karabəŋ een kelegit, abon avacu biyene zee been zel.” Anyayit ni niigi ŋoliin ci appe ɔɔɔt zooze nico. ²¹ Ma kaalyana ci baal acin niigi ŋinaante neke dook, anyek nɔɔgo kotoŋole looc ɔɔɔt. Mayo nuun een Mosis baal een alaan uneŋ oontane nɔɔgo e ele, aŋole buk waanice looc zee ma azi ne, “Kabariti, ma kaŋole looc ɔɔɔt ele.”

^{22–24} Bar zin niiga giye o utuyu Yesu, ivitayu nɔɔno kɔkɔm ŋoliin. Nɔɔno zin neen o azoozet ageet biyete ogin ŋume o Joowo giye o aterket Jooi been ɔl o deer. Ma biyeta ogine alaŋ eel kiyo biyeta baal Abel e. Waanice biyeta o Abel aluwek Jook arɔŋ cacinet ŋaatin. Maje biyeta ci Yesu o anyek Jook kaara ŋaatinai oŋe ogaac ger gɔɔn kabaca dook lai. Bar zin niiga giye o utuyu nɔɔno ivitayu kutur o kazi Jerusalem Colai o abaai Jooi o arogi. Kuturi nici abil biye o kazi Ziyon. Ivitayu buk niiga ŋin o aloten toonnyawa o Joowo meel ger. Alote niigi ŋinaante o ka katalɔ. Eeginu zin niiga abuunya o eteyet Jooi zaar ugooc waragewa tammu tadena. Ivitayu buk niiga Jook o apak ɔl dook. Ma oromtozeyu ɔl o anyek Jooi kobonta ŋume onin.

²⁵ Abon zin niiga agenyu ka calaŋ abornu Jook o azoozekuŋ igeet. Baale ɔl o Israyil baal abor Jook iiten o azɔɔzeke Jooi nɔɔgo be tadena e, ŋaan kajaarit niigi nɔɔno. Zin mā kabor naaga ŋaati kaziŋni Jook o azoozeket ageet tammu tedena, alaŋ kanim kajaarit nɔɔno been neen. ²⁶ Baale mɔlɔyi baal azɔɔzeke Jooi ɔl o Israyil e, amɔɔni looc dook kirakirak. Bar zin inoko aduwaket niini waragewe onin gi ci azi ne, “Kamoonɛ bodo katin tammu taden ki tɔɔ lak codoi tɔr nɔkɔ.” ²⁷ Ma zɔɔz nicini ayeleket ageet gi ci ka katin kidicai Jooi kaal kebere nicoko dook loota ŋina lai, ka zin keelit kaal o alaŋ amɔɔt doon. ²⁸ Abon zin kanyek naaga Jook zany giye o anyet niini ageet baliin onin ka kaavtiye naaga calaŋ kamɔɔt. Kanycek Jook zany, ma kadiŋdiŋan nɔɔno gole ween didi ŋoliinta ka kanycek nɔɔno katalɔ. ²⁹ Eeci Jooi cina kadiŋdiŋan naaga o, abil kiyo goo o atooz kaal dook lai o.

Baayiz o atal Jooi

13 ¹ Gɔtɔnɔga o tuwento, emeda eɣeɣzɔ niiga dook. ² Abon atalnanu kernok korogjowe ugooc. Anyak baale ɔl oogi ci atalna keeron korogjowe cigeec nɔkɔ zee makacin iiten co anyaaktak toonnyak ci Joowo kɔrɔk calaŋ aga niigi bar te een toonnyak ci Joowo o. ³ Abaabanit ɔl o acabje kiyo bar acabinu niiga ki nɔɔgo o. Abaabanit buk gɔɔn ɔl o agide kiyo bar agidenu buk niiga ki nɔɔgo o.

⁴ Abon azooni ɔl dook keer o rociinto. Abon eeti ki ŋaa cin areezɔ, ma aziikno niigi dook juruŋ calaŋ areeca bodo bitaala eo aricanoneke nɔɔgo, eeci mā agoonek eeti ŋaa cin kaal ci ger karabəŋ areeca niini, didile apayek koca Jooi nɔɔno gerzitin.

⁵ Mā anyeku zin zinzeeti kiziti appinte guruci, bar anycek zinzeeti keleentɔ ki kaal ugooc anyaku, eeci azi Jooi ne, “Alaŋ kakolekuŋ looc aavtiz doon been neen. Akom kina! Alaŋ kakolekuŋ looc.” ⁶ Abon zin kanyak naaga moozet ci kane zinzeetine ci atuwe ne, “Manyi neen o atiritan aneet. Alaŋaan bodo naana kanyei ŋoliin been neen, eeci akom eeti ci deer gi ci ka kutuguweyan aneet.”

⁷ Abaabanit di niiga ɔl baal laadun anyaakuŋ igeet tuwen ɔwa e kibeen ɔl baal ademzekuŋ igeet zɔɔz o Joowo e. Abaabanit gɔl uneŋ abon baal abaai zee ma alam adaai e. Abon zin buk niiga atuyu Jook kiyo baale niigi e. ⁸ Ma Yesu Kiristo abil niini iinya dook kizi nɔɔno ele nɔkɔ, balawaz, ki inoko, been tiŋeere nɔkɔ zee been neen. ⁹ Mā anyeku zin ɔl o gɔɔn ademez gɔnɔgi demziin ci aŋɔrɔwɔ ki demziin o ɔl baal ademez uŋ igeet ɔwa e kipiktawuŋ gole o tuwento. Agayu niiga lotinowa o keerit o Juz akati dayiin akom keŋti kina. Ma ɔl o ano lotinok niceke alaŋ niigi ajowa tirten. Bar zin deten o Joowo neen o anyuŋ igeet dɔyiz.

¹⁰ Ma naaga ɔl o kuteec Yesu izi todoyoi cina neen niini. Ma alaata o agoonek ɔl todoyok ugeec gole o keer o Juz, alaŋ kazɔl naaga ki nɔɔgo tirten o kajowa naaga ŋaati Kiristo ween todoyoi onai. ¹¹ Baale gɔɔn alaata o ceez o Joowo agoonek ɔl todoyok ci baciinok ugeec abaca, ma anyaak biye ci todoyoito noko ŋin o alile ɔɔɔt. Maje todoyoi ele avɔ avaat niigi kutur o kazi Jerusalem bawuca ŋinaante, kɔkɔm eet ci adak been neen. ¹² Zin gole ci atobɔ ki nice buk Yesu igide, ma ook adaak niini kutur bawuca ka kotoony ɔl biyete ogin. ¹³ Abon zin kavɔ naaga ŋaatin ŋinaante ka kɔɔt kozolit kibeen nɔɔno alyaan onin agɔɔneke ɔl nɔɔno kaal o ger. ¹⁴ Eeci akomnet ageet loota ŋina kutur ci abil kodot. Kare naaga kutur ci ka katin kanyaayet Jooi e. ¹⁵ Abon zin naaga kanaat Jook tup ŋaaten Yesu. Ma naatinet cinai kanaati Jook o atobɔ ki taabinet cinai kanyek naaga nɔɔno. ¹⁶ Mā anyeku kereyeyuŋ ŋaati agoonu kaal ci abon. Itiritit buk ɔl oogi, eeci kaal ci abon agoonu o eel kiyo todoyowa o atal Jooi o. ¹⁷ Iziiyit alaat ugooc tuwento arayinuŋ igeet, eeci azoonuŋ niigi igeet liŋliŋonte uneŋ tup nɔkɔ calaŋ ayubuz. Ma itene oman ŋaan eel niigi ŋume o Joowo, ma aduwak nɔɔno liŋliŋon uneŋ, mā da gɔɔn didi azoonuŋ niigi igeet juruŋ gole o Joowo. Mā aziiknu nɔɔgo, aliŋliŋ koca niigi liŋliŋon uneŋ talniinta. Bar mā alaŋ aziŋnu nɔɔgo, aliŋliŋ koca ŋaati alaŋ atalnin zinzeeti ugeec, ma gi nici alaŋ atirituŋ igeet.

Karooŋnyuŋ naaga igeet aŋaruyozetu

¹⁸ Ijinteyetu zin buk niiga ageeta Jook. Kagaya ŋedet naaga kanyaka zinzeeti ci abon, eeci karooŋnya naaga kutuguza kaal o abon dook. ¹⁹ Kilalekuŋ zin igeet ijinteyan Jook ka kokoleyan Jooi gɔl ci kamiironekuŋ taman.

Abon bai azuunuŋ Jooi

²⁰ ɔdɔŋa Jooi daayiza Manyi ona Yesu ween eet o adikir towawiinto o oowayet ageet ɔl o katu nɔɔno. Biye ogin neen o azima gi baal aterkedeket Jooi ageet e, ka zin kameda terkediin kɔɔk nɔkɔ been neen. ²¹ Nyamer kanyuŋ Jooi o anyek ɔl kanyayit ganon zinzeetine ugeec kaal o abon agano ki roget unooŋ dook ka iliŋliŋti niiga kaal o arooŋekuŋ niini igeet utuguz juruŋ. Nyamer buk Jooi kiliŋliŋ ŋaatina dook gole o Yesu Kiristo ka keelit naaga eo arooŋeket niini ageet keelti. Abon bai adiŋdiŋan ɔl dook Yesu Kiristo nɔkɔ zee been neen. Nɔɔno neen.

Kilalekuŋ igeet uzuuti zɔɔz can o

²² Gɔtɔnɔga o tuwento, kalayuŋ igeet ka aryek zinzeeti zɔɔz can kadizkekuŋ noko. Zoozowa ci kayeedekuŋ igeet noko alaŋ meele ɔɔɔt. ²³ Karooŋnyuŋ zin agaac gɔtɔna ona kazi Timozi baal acabje e ɔɔgjai cabiinta. Mate akunakan niini aneet ŋaato kataman, korkorya koca ki nɔɔno iiten ci kakɔye ŋaatunooŋ.

²⁴ Azaayeyan zin alaat ugooc tuwento kibeen ɔl o Joowo dook ŋinaante. Azaayuŋ buk igeet ɔl o Joowo o avu looce o kazi Itali dook.

²⁵ Abon bai amayukuḡ Jooi igeet dook. Nəḡḡ nəen.